

翠石山人輯

续天下名山勝景記

下冊

●江西 四十五篇

●遊百花洲記

董桂敷安徽婺源人

漢季徐孺子耕稼不仕以名德傾動一時賢公卿宋南渡初蘇雲卿僑隱灌園張魏公遣人致之不能得二公之器量儻然塵表使人百代下翹首而思吾乃今於百花洲之遊得見其人幸哉洲之南與孺子亭相望其東偏有蘇公菜圃境之清曠蓋與二公稱景在卽人存先後吾遊者殆有同心矣然吾昔讀二人傳時固已有今日之景在吾胸中其得而目遇之亦誠之所接豈不知先後吾遊者其中之所存何若也洲在城市中而有物外趣蓋人之清操自立不染塵滓者胸次類然何必二君汪汪千頃陂黃叔度呼之欲出也吾觀夫水之溶溶木之猗猗軒窗之浩浩卽吾人性天所流露仲春之月百花爛開洲不必有花而無適非花遊者自可意會且花有榮悴而洲之景妙備四時

不假於花。執花言洲。與執洲言洲。均泥也。其諸柯葉不改。萬古常新。古高賢逸士。自寫其精神。藉於地以顯歟。自吾聞南昌有百花洲。卽虛揣其景。乃今之所見。又勝。抑亦山川之靈與。人心相洽。緣虛得實。趣有獨深。因以引其自得者。機歟。坐隄上。亭有鳥飛鳴於木末。遊儵唼波。時有沫起。隨風吹散。念詩人鳶飛魚躍之言。味無極也。

●東路記

惲敬
江蘇陽湖人

南昌城上溯豫章江南至贛州東北折溯貢水至瑞金共一千五百里。敬上事及赴行臺省期會皆由之。此西路也。東路止八百九十里。嘉慶十一年十月二十六日己亥。奉回任檄。出進賢門。宿舒白香天香館。寢甚安。二十七日上晡發行六十里。宿任港。夜大雨。二十八日早發。泥瀟不可行。行六十里。宿進賢。大風寒。二十九日晴。早發行九十里。宿臨川。署中秦臨川言于清瑞公。成龍作縣事甚備。三十日上晡發行六十里。宿柯樹。

亭。柯卽桓。山海經註。所謂葉似柳子似棟者也。桓音近華。華近和。漢書尹賞傳注。桓表。陳宋之俗言桓聲如和。謂之和表。師古曰。卽華表也。和又近何。俗遂作柯。十一月初一日甲辰朔。早發行九十里。宿南城。過曾香墅。鄧蘭士。蘭士從弟薌州。初二日下晡發。取便道。吳白厂草堂在城南。不及過行四十里。宿揚村。初三日行八十里。下晡至南豐。王南豐滌硯。十一閱之。渡河復五里。宿楓嶺。初四日行八十里。宿甘竹。雨。初五日行三十里。下晡至廣昌。復三十里。宿竹橋。初六日行九十里。宿甯都州。初八日早發。行八十里。宿葛藤凹。雨。初九日行八十里。下晡至瑞金。初十日上事南昌。至南城。皆平道。南城之南。始山行。麻姑山旁。薄有靈氣。其西南隱然浮一峯。雲氣界爲三成。如仙嶠。搖漾不可測。最上一成。雲氣背落日如紅綃。奇觀也。問之。則南豐西之軍封山。蓋拔見在二百里之外。軍封之南。至甯都。多石山。千幢萬旛。皆南指。然無如軍封山者。廣昌之北。盱水北。

流至新建與豫章江會。廣昌之南二十里。溪皆南流。又三十里復北流。又三十里復南流。皆不可舟。四十里至甯都會。梅水可舟。甯都之南。溪皆北流。六十里至九段嶺。始南流。四十里至嚴阬。復北流。五十里至麻子。陝復南流。不可舟。三十里至瑞金。會貢水。可舟。皆東路也。貢水至雩都會。甯都之梅水至贛縣。入章水。合爲豫章江。卽西路也。豫章江至新建縣。北入鄱陽湖。

●重建東湖書院記

惲敬

東湖據豫章城之東隅。周古步十里有奇。東崖爲蘇圃。有宋高士蘇雲卿之遺跡。其南泮翼然。亭臨之。祀漢徐孺子。故言東湖之故。必以徐孺子蘇雲卿爲先。南泮之北。沙斗入北佩湖。南以南泮爲至。環三面皆水也。宋嘉定中。通判豐君有俊。建東湖書院。館四方游學之士。迨明之初。以其地爲縣學。而書院遂廢。今幾五百歲矣。羅山黎君來令南

昌復卜地於縣學迤東。蓋前事以虧帑沒入其宅者。黎君歸帑於官。爲銀若干。諸鄉先生任講堂學舍。築削之貲。爲銀若干。修殿梁椳膏油舟輦之貲。復爲銀若干。於是深衣博帶之士。揖讓弦誦於其中。而書院復興。夫聖人之道大矣。學者必先去其害道者而後事焉。孔子曰。行己有恥。孟子曰。人有不爲也。而後可以有爲。昔者徐孺子不與陳仲舉鈎黨之難。蘇雲卿當宋播越之餘。張德遠欲有所圖。而雲卿褰裳去之。其心皆斷然有不可涅者。夫鈎黨爲君子之過。且遠之如此。况小人歟。張德遠處已甚正。所圖雖不成。其志皆仁人志士所扼腕者。且遠之若此。况以國爲徼倖者歟。學者能見於此。然後依附攻訐之學術。苟且之事。功不足動其毫末。由是而深造之。則庶幾矣。

●西山諸靈跡記

徐世溥

江西新建人

由洪崖而進爲紫清諸峯。迤邐西北折。許母冢在焉。嶽嶷嵒礚。險不可升。不苔而滑。至

者皆解騎特前攀。負耆藤垂視婦步。鞠躬拾阪猶數退踏。或從高仰躡袞袞然若疾丸注坡矣。其上乃交柯錯蔭。百卉翳翳。曩之所謂俯廬阜襟彭蠡者皆不可見。土人嘗有竊葬者。秋霽縋棺而上。亭午始至半山。霹靂交作。樹木皆鳴。送者駭眩。而棺已在山下。自是雖過者必式云。山中諸所傳他奇怪不備志。其跡之存者皆在東莊以北。爲劍。爲白。爲礎。爲棺。爲拜藉。爲几。爲胡牀。爲石豕首。豕首加劍其上。耳馘其巔。有盞承之。細流胥注。若刳血然。白中水冬夏不竭。土人病目者。至稽首沐之。輒瘳。或杯去之。旋竭。旋盈。乃至彌日亦不更淺。白中虛下實。水環其外。無竇下通。或挹澗益之。亦不更滿。其礎動否。在人敬怠。宿誠以往。輪旋若飛。嬉戲引之。千鈞不翅。臏絕無益矣。予銘其陽曰。澗水如脂。可以沃臍。上土轂轉。下愚不移。時同遊者皆笑。比至棺石。棺露前。和半藏山內。拜石外橫。復識之曰。匪革匪玉。無縫孰穀。拜石長在衣冠其消。千年寒食。誰奠王喬。復前

求石几。在社廟南。隔水數十丈。石滑而礚。古無人蹤。予與長兄揭而從之。山中人劉猗者好事。亦能從焉。予至卽先據胡牀。隱石几。是時日旣薄午。青峯延光。草木暄藹。無名之香。四山而至。澗水泠泠。鳴流几下。伸膝濯足。不煩更起。隱几欣然。恬悵便臥。覺而啫焉。猗遂導至程氏山莊。程氏者故東莊人。入居于此室中。老幼數口。青山當簷。修竹四映。園中雜植果實。緯以藥蔬。其人好道。頗受仙籙。聞予至卽下園果數品。有栗有柿。有棊有橘。從以新酒。時菊載黃。雜英照山。問此往當復得石乎。便攜酒懷果。緣澗委蛇。徑得石巖。巖中石筍如柱。下石方徑數丈。上稍短若檐。飛湍界其上。衝澗激其旁。細流環其下。如鐘如磬。如簧如琴。金石絲竹之聲。紛然逕至。耳不給聽。淒神寒骨。傾榼不醉。皆水激石而爲之也。旣辭程氏。爰陟前岑。道旁石上。實覲驢跡。劃若在泥。所謂雪精之跡也。少進有數巨人跡。在盤石上。望之綦長。比往踐之。隨人長短。各稱其足。鄉人相傳謂

昔仙遺此以鎮雪精者。予笑言神人奈何與怪絜足。令乘而策之。跡安歸乎。古云不知足而爲履。若斯者乃可耳。日既西傾。環岡赤黃。頽陽遺色。望高山頂草。繚繚焉若綠煙。裊天矣。循塗言歸。數里已夕。山農畚田。白煙瀾野。如水月相混。咫尺之間。茫然灑氣。目不辨色。喜山中人能導。無天台誤也。歸廬張燈。殘魄已上。是時維月向晦。山中無漏。以月計之。蓋三鼓矣。

●洪崖鄉大陽神廟碑

陳宏緒

江西新建人

距會城三十里。有村曰南寶。負山帶流。符姓聚族而託處。予曩讀書其廬。聞有大陽神者。靈驗甚著。每歲六月廿三。俗傳爲神誕日。符姓偕居民。旗幟鼓吹。肅衣冠而虔祀。祀必具酒醴蔬菓。侑以角黍。云神固與汨羅同嗜。予姊夫符元夫。時以祭餘相餉。因歷問神之鄉土姓字。與其行蹟封爵。則故老概未之詳也。崇禎間。予方刺晉。夢置身層臺之

上臺中折崩聲如雷。自分肢骸瞬息齏粉。俄而赭袍從空而下。掖之起。仰視霓旌飄搖。彷彿有大陽字。已爲督察相國誣參。繫詔獄。賴神庇佑。卒免于難。海宇瀕洞。予避地石河。咫尺讀書舊廬。擬載牲醪酬夙願。竟以倉皇未果。戊子。變起肘腋。襆被就元夫。商所以全家室。語未畢。鐵騎颯馳而來。予攜累急詣所謂南寶青龍山者。則神之廟貌在焉。搏穎拳石。謝且祈。是夜宿靈寶壇。村氓奔集。以數千計。抵二更。呼聲海沸。見大小虎十。三頭魚貫而下。鐵騎怖不敢上。嗣後圍城且久。兵日衝突于崇山峻嶺。早暮無間。予輩岌岌不免。一日有兜鍪數騎介而登。馬健甚。持矛而衛者皆辟易。至廟前。忽一馬仆。兜鍪者四顧。若有所畏而去。去且遠。村氓走。則馬死久矣。時暑甚。馬至旬日。猶僵伏如虺。隕。衆請于神。謀遷之。筊弗許。迨夕。疾風暴雨。死馬忽自移去。離故處數丈許。若有鞭策驅之。于是衆咸知神之保護一方而示威靈于馬也。喪亂甫定。符氏內甲興庶諸君。

暨予甥子後感神曲全此村謀飾土木以報乃拓古廟而更新之益以堂室門廡丹牖輝煌予友謚聖曲爲之記事與文並奇崛可傳而子後意尙未已復徵廟碑于予念前此邀庇佑于冥漠者屢矣不敢以續貂爲辭獨嘆神之威靈赫赫如是然大陽之號僅著于洪崖數十里間上之封爵罔聞于宗伯不得列宸懸沈埋之典次之姓名無徵于郡邑羣有司亦未嘗有犧牲粢盛玉帛之薦宜其于禦災捍患漠然度外置之乃神之勤勤懇懇加惠以生吾民不以莫我知而少怠也視夫陟崇班而痼瘵不切于衷受顯名而阡危弗關于慮者能無過祠下而汗背也哉古稱名山川澤度可以出財用者皆在祀典洪崖壁立千尺秀削不可名狀泉湧其側凡九十七曲而達于河斯罔神之所徜徉而樂處也廟創始于辛卯落成于壬辰捐資而邪許相助者若而人別伐石以紀姓名茲不備書

●莊居聽雨記

陳宏緒

乙酉予居石莊自四月八日至五月朔爲雨者凡二十有三日時楚鎮猝下皖口長沙羽檄絡繹城內外徒跣交馳泥淖沒膝往往仆蹶不能起予獲偃臥山間飽聽澎漚洶磕坎窾淅瀝之聲夜以繼日有客過而弔之曰子抱火厝之薪下而處火已燃而尙未之覺也予曰固然然舍此復安有樂土之適乎亦姑聽此而已且予生四十九年何歲不雨何歲不聽然而輪蹄之響或亂之友朋笑語之音或亂之華筵綺席鐘鼓笙簧之奏或亂之市喧巷諺城笳戍角之紛沓或又亂之其幸靜而伊吾暇而吟哦則又以其喉吻而自亂之獨此二十三日之中座無賓門無車馬懸無金石左右四顧無人兼以倉卒至其地無書可讀又病齒不復作詩窅然寂然一惟此澎漚洶磕坎窾淅瀝之入吾耳然後知天地間聲之奇者莫過于是蓋有如睢陽常山之恨怒者焉有如三閩之

憔悴行吟者焉。有如南霽雲之啞、叱咤者焉。有如司農之笏擊碎、武穆之馬悲嘶者焉。有如雷海青之擲樂器焉。有如杭丐者之泣冬青焉。有如毛惜惜之絃管焉。孰不爲之低徊、霑衣、纈、無已。憶曩者遊長安道，忽晝晦，疎點大如車輪，與友人朱白石沽易州酒，拔劍斫地歌鐵崖臨濠武雙虎殪，諸篇頗自負，謂三百年聽雨一快，今空山聲響大異，而予友亦不可復作矣。嗚呼，豈獨痛夫予友也。

●章貢讀書樓記

陳宏緒

贛水在豫章爲最大。漢書地理志稱豫章水，又稱彭水，後遂析其字而名之曰章貢。其實一水爾，非有二也。贛水出聶都山，控引衆流，北過會城之谷，鹿洲經度支步，建瓴而下石頭津焉。津之東岸則章門也。豫章諸水畢匯于此，其自南城來者曰盱水，自金谿來者曰汝水，自高安來者曰筠河水，自城中迴折繞南塘而來者曰東太湖水，予于諸

水所匯。誅茅而結廬焉。復構樓其上。題之曰章貢讀書樓。從其最大者而名之也。樓踞古隄之隆起處。歷層階十有二級而定基。勢甚軒聳。其前俯臨長江。浩淼無際。野曠而天。遂低沙洲。經緯乎其間。時隱時現。時又三四現。視水之盈縮爲多少。西山展丹青而環抱之。隱現于去來之雲。亦如沙洲之隱現于水。其左則石亭寺。韋武陽殘碣猶存。其右則滕王閣。簾棟新開。彷彿當年名勝。予樓旣落成。暇輒憑欄送目。或風帆烟艇蕩漾于夕陽。曉日與鷗鳧同其閒靜。或雪屋銀濤轟吼于驚颿濁霧。一時村墟草樹晦明失色。予皆得飽閱之。每晝倚危欄而把短帙。夜坐匡牀而理殘編。歷數載罔有倦怠。未嘗一日而手輟披綴。口廢吟哦于茲樓也。名曰讀書。聊以識吾之所嗜云爾。雖然。談何容易。昔司馬端明居夏縣。偶至鳴條山。餘慶寺。父老五六輩持瓦盆進粟飯。請爲論說經旨。端明取紙筆書孝經。庶人章講之。旣已。父老進曰。自天子章以下。各有毛詩兩句。此

獨無有何也。公默然。少許謝曰。某生平慮不及此。當思所以奉答。夫以兒童誦習之孝。經而問淹洽之溫。公尙有慮不及此。况其下焉者乎。談何容易。乙未季秋廿一日記。

●重修平西壩河隄記

年

江西廣昌人

漢志豫章水以十數。盱爲東南最上流。發源廣昌鐵木嶺。酈道元謂盱水出南城。縣者乃其流也。時廣昌未有縣。故道元據昔言之云爾。由鐵木嶺流百二十里。至縣西南。匯雩水爲河。波益湓澹。勢將徑趨北。復折而東。繞縣北流。面河而城。城西二里許。當盱雩之衝。水北潰則灌城。故壩與河隄。關係最大。宋淳祐間。始創築之。水得東行。城永無患。明季以來。因循弗治。崖隤石頽。墮其故跡。淫潦夏漲。山水怒突。壞堰嚙城。民浸浸憂魚禍。蓋百餘年於此矣。黃令允肅。作邑之五年。政用和洽。僉謀邑人。思徙民患。復厥舊規。衆志蒸蒸。各奮貲財。如治其私。經略指畫。俱有程度。胥不得侵。工用不訾。役始于雍正

十二年八月。十閱月。具圖牒上。平西壩河隄成。余披圖隄長。以引計者十有五。而加七尺。廣以丈計者四。高以尺計者八。石砧土擊。虹亘墳防。樹以楊柳。流波汙汙。婉轉推漾。上甃石路。如隄之長。以便往來。壩視舊益堅。而新增其一。白金之糜。以兩計者一千有奇。費省而功多。復用其羨。起祠于壩側。亭曰龍珠。用妥龍神。備水旱祈禱。臺于龍岡。曰平西。廣昌地志亦曰平西。故壩與臺同稱平西者。從其朔也。皆邑曩所有。既圯而復焉者也。縣學舊引二水從西北入城。繞泮宮東出。淤闕既久。開淤實隄。以築爲濬。溪流域中。與江吐內。其於邑治。可謂彬彬。柳宗元云。賢者之興而愚者之廢。廢而復之。其事必由乎賢者。推是類也。可以從乎政矣。黃令能恪共其職。宣上德意。擇是大者爲斯民計久遠。其治之人。能慕義翕欲。無敖從康。以襄令所欲爲。皆可書也。布政司復申令。丐予文勒石。予嘉令績。因遂記之。俾永無墮。

遊福山記

涂瑞

予與族兄築野、陳子凝齋訂交十餘年矣。有文必共賞。有書必共讀。有佳山水必同往。或欲獨行。則往往不遂。凝齋未第時。遊學京畿。嘗往來江淮、齊魯間。凡名山勝地。秀偉奇特之區。未嘗一留覽焉。予亦兩計偕北。上寓京江府署數月。登城日望金焦。終未一至其處。非予與陳子寡情於山水。意蓋將有所待也。今秋築野歸自兩浙。極言山陰之勝。亦終以無吾與凝齋。偕不及肆力探討爲憾。吾邑佳山水。以福山爲最。距城南四十里。延袤綿亘若屏障。然峯最高者爲簫曲。就城市望之。煙雲倏忽萬狀。不可端倪。築野少時嘗遊其地。頻年相招同行。以凝齋外出未果。今十月望前二日。爲築野尊人七十壽。入山避客。築野以疾不得從。予與凝齋、鄧子偉之暨築野之子偕行。初入谷。因山交峙。澗水環流。循澗度船石嶺。至寺門。一路松陰交翠。飛流濺沫。境幽矣。未曠也。由寺門